

ceux qui l'écouteront, & à ceux qui l'ont veu. Certainement nous auons créé en six iours sans peine le Ciel & la Terre, & tout ce qui est entr'eux; Perseuerer, ne t'impatiente pas des paroles des infidelles, exalte la gloire de ton Seigneur deuant que le Soleil se couche, & auant qu'il soit leué, prie ton Seigneur à l'entrée de la nuit, le dernier de tout sera l'adoration. Escoute lors que l'Ange t'appellera au Jugement general, ce iour tout le monde entendra la trompette, le peuple sortira des monumens, & la terre s'ouurira deuant les yeux des hommes. Je donne la vie & la mort, & tout le monde sera assemblé deuant moy pour estre iugé; Cette assemblée m'est facile à faire, ie sçay ce que disent les impies, tu ne leur feras pas embrasser ma loy par force; enseigne-la à ceux qui craindront les tourmens preparez pour les infidelles.

*LE CHAPITRE DES CHOSES
dispersées, contenant soixante versets,
escrit à la Meque.*

*Gelaldin
& Falkre-
din insi-
eulent ce
Chapitre,
des choses
qui di sper-
sent.*

AV nom de Dieu clement & misericordieux. Je iure par les vents qui disper sent la poussie-
re, par les nuës chargées de pluye, par le nauire qui
court sur les eaux, & par ceux qui partagent les biens
de la terre, que ce qui vous a esté promis est tres-ve-

ritable, & que le iour du Iugement est infaillible. Je iure par le Ciel & par les Estoiles que vous estes en vne tres grande erreur, Dieu esloigne de luy les menteurs, il maudit ceux qui blasphement, & ceux qui ne croient pas en la resurrection; Ils demandent quand sera le iour du Iugement, ce iour ils seront chastiez dedans le feu d'Enfer. On leur dira, goustez les tourmens que vous auez demadés avec impatience. Ceux qui ont eu la crainte de Dieu deuât les yeux, seront en des iardins ornez de fontaines, ils iouïront des plaisirs que Dieu leur a preparés, parce qu'ils sont gens de bien, ils dorment fort peu la nuit, ils demandent pardon à Dieu des l'aube du iour, & donnent l'aumônes aux pauvres mendians & aux pauvres honteux. Dieu fait paroistre en terre & en vos personnes les signes de sa toute-Puissance, ne considererez-vous pas que ce qu'on vous a promis est escrit au Ciel? Dieu est Seigneur du Ciel & de la Terre, il est la verité mesme, ne le confesserez vous pas? Les Anges t'ont-ils apporté les liures d'Abraham? Lors qu'ils sont entrez en sa maison ils l'ont salüé, il les a aussi salüés, il a fait signe à ses gens d'apporter vn veau gras rosty qu'il leur a présenté; Il leur a dit. Pourquoi ne mangez-vous pas? & a eu peur dans son ame de leur venue; ils luy ont dit, ne crains rien, nous sommes messagers de Dieu, ils luy ont annoncé qu'il auroit vn fils qui seroit grand personnage. Alors sa femme s'approcha criant à haute voix, & se battant la face, dit, vne vieille sterile ne fait point d'enfant; Ils ont dit, la cho-

se arriuera comme nous l'auons dite, ton Seigneur ordonne ce qu'il veut, & sçait tout. Abraham leur a dit, ô Messagers de Dieu, quel est vostre dessein, ils ont respondu, nous sommes enuoyez de la part de Dieu pour exterminer les villes habitées par des meschans, & pour ietter sur eux des pierres de feu sur lesquelles sont escrits les noms de ceux qu'elles frapperont, nous ferons sortir tous les gens de bien qui sont entr'eux, si nous n'y trouuons qu'vne maison de gens de bien, nous y laisserons vne exemple à la posterité pour ceux qui ont peur des tourmens de l'Enfer. Moise est vn signe de nostre toute-Puissance, nous l'auons enuoyé à Pharaon avec des raisons claires & intelligibles, il a mesprisé mes commandemens, & a dit que Moise estoit vn Magicien & vn demoniacle, mais nous l'auons surpris & auons submergé les gens à son grand deplaisir. Aad est vn exemple de nostre toute - Puissance, nous auons enuoyé vn vent impetueux contre ces impies qui les a exterminés. Temod est vn exemple de nostre toute-Puissance avec les gens. Ils se sont enorgueillés, & se sont esleuez contre les commandemens de leur Seigneur lors qu'on leur a dit que la punition des meschans estoit differée à vn autre temps, mais le tonnerre les a surpris, ils l'ont veu, ils n'ont pas eu la force de demeurer sur leurs pieds, & ont esté priuez de protection. Le peuple du temps de Noé est vne exemple de nostre puissance, nous l'auons exterminé, parce qu'il estoit impie: Nous auons basty le Ciel,

avec force & vertu, ie suis celuy qui donne la force & le pouuoir, nous auons estendu la terre, & auons creé le male & la femelle de toute chose, peut-estre que vous y penserez. Dis leur, conuertissez - vous à Dieu, ie suis enuoyé de sa part pour vous prescher les peines del'Enfer, ne croyez pas que Dieu ait vn autre Dieu avec luy, les impies ont cy - deuant dit que les Prophetes & les Apostres qu'il a enuoyés estoient magiciens & demoniacles, ont - ils recommande à leur posterité d'en faire de mesme? Certainement ils sont dedans vne grande erreur; Esloigne-roy de leur compagnie, & ne t'afflige pas de ce qu'ils disent, presche l'Alcoran, il est vtile aux gens de bien, ien'ay crée les Demons & les hommes que pour m'adorer. Dis leur, ie ne demande rien aux infidelles pour les instruire, ie ne demande pas, qu'ils me nourrissent, Dieu enrichy qui bon luy semble, il est tout-Puissant, les meschans seront chastiez comme ont esté chastiez ceux qui les ont precedez dans leur malice, leur temps viendra, & malheur leur arriuera au iour du Iugement.